

摛藻堂四庫全書薈要

集部

欽定四庫全書

渭南文集卷四十七

集部

渭南文集卷四十七

宋 陸游 撰

入蜀記

二十七日郡集於南樓在儀門之南石城上一曰黃鶴  
山制度閑偉登望尤勝鄂州樓觀為多而此獨得江  
山之要會山谷所謂江東湖北行畫圖鄂州南樓天  
下無是也下闢南湖荷葉彌望中為橋曰廣平其上

皆列肆兩旁有水閣極佳但以賣酒不可往山谷云  
凭欄十里芰荷香謂南湖也是日早微雨晚晴

二十八日同童冠之秀才甫登石鏡亭訪黃鶴樓故址  
石鏡亭者石城山一隅正枕大江其西與漢陽相對  
止隔一水人物草木可數唐沔州治漢陽縣故李太  
白沔州泛城南郎官湖詩序云白遷於夜郎遇故人  
尚書郎張謂出使夏口沔州牧杜公漢陽令王公觴  
於江城之南湖其後沔州廢漢陽以縣隸鄂州周世

宗平淮南得其地復以為軍太白詩云誰道此水廣  
狹如一足練江夏黃鶴樓青山漢陽縣大語猶可聞  
故人難可見形容最妙黃魯直宵征江夏縣睡起漢  
陽城亦此意老杜有公安送李晉肅入蜀余下沔鄂  
及登舟將適漢陽詩而卒於耒水可恨也漢陽負山  
帶江其南小山有僧寺者大別山也又有小別謂之  
二別云黃鶴樓舊傳費禕飛升於此後忽棄黃鶴來  
歸故以名樓號為天下絕景崔灝詩最傳而太白奇

句得於此者尤多今樓已廢故址亦不復存問老吏  
云在石鏡亭南樓之間正對鸚鵡洲猶可想見其地  
樓榜李監篆石刻獨存太白登此樓送孟浩然詩云  
孤帆遠映碧山盡惟見長江天際流蓋帆檣映遠山  
尤可觀非江行久不能知也復與冠之出漢陽門遊  
仙洞止是石壁數尺皆直裂無洞穴之狀舊傳有仙  
人隱其中嘗啓洞出游老兵遇之得黃金數餅後化  
為石東坡先生有詩紀其事初不云所遇何人且太

白固已云頗聞列仙人於此學飛術一朝向蓬海千  
載空石室今鄂人謂之呂公洞蓋流俗附會也有道  
人澶州人結廬洞側設呂公像其中洞少南即石鏡  
山麓麤顽石也色黃赤皴駁了不能鑑物可謂浪得  
名者由江濱堤上還船民居市肆數里不絕其間復  
有巷陌往來憧憧如織蓋四方商賈所集而蜀人為

多

二十九日早有廣漢僧世全左縣僧了證來附從人舟

日昳移舟江口回望堤上樓閣重複燈火歌舞夜分  
乃已招醫趙隨為靈照視脉

三十日黎明離郢州便風掛帆沿鸚鵡洲南行洲上有  
茂林神祠遠望如小山洲蓋禰正平被殺處故太白  
詩云至今芳洲上蘭蕙不敢生梁王僧辯擊邵陵王  
綸軍至鸚鵡洲即此地也自此以南為漢水禹貢所  
謂嶓冢導漾東流為漢者水色澄澈可鑑太白云楚  
水清若空蓋言此也過謝家磯金雞洑磯不甚高而

石皆橫裂如累層甓得縮項鯿魚重十斤狀中有聚落如小縣出鱘魚居民率以賣鮓為業晚泊通濟口自此入沌沌讀如篆字書云水名在江夏過九月則沌涸不可行必由巴陵至荆渚

九月一日始入沌實江中小夾也過新潭有龍祠甚華潔自是遂無復居人兩岸皆葭葦彌望謂之百里荒又無挽路舟人以小舟引百丈入夜財行四十五里泊叢葦中平時行舟多於此遇盜通濟巡檢持兵來

警邏不寐達旦

二日東岸葦稍薄缺時見大江渺瀰蓋巴陵路也晡時次下郡始有二十餘家皆業漁釣蘆藩茅屋宛有幽致魚尤不論錢自此始復有挽路登舟背望竟陵遠

山泊白臼有莊居數家門外皆古柳侵雲

三日自入沌食無菜是日始得菘及蘆菔然不肯斷根皆刈葉而已過八疊洑口皆有民居晚泊歸子保亦有十餘家多桑柘榆柳

四日平旦始解舟舟人云自此陂澤深阻虎狼出沒未  
明而行則挽卒多為所害是日早見舟人焚香祈神  
云告紅頭須小使頭長年三老莫令錯呼錯喚問何  
謂長年三老云梢工是也長讀如長幼之長乃知老  
杜長年三老長歌裏白晝攤錢高浪中之語蓋如此  
因問何謂攤錢云博也按梁冀能意錢之戲注云即  
攤錢也則攤錢之為博亦信矣過綱步有二十餘家  
在夕陽高柳中短籬晒罾小艇往來正如畫圖所見

池中之最佳處也泊畢家池地勢爽垲居民頗衆有一二家雖茆茨結廬而窗戶整潔藩籬堅壯舍傍有果園甚盛蓋亦一聚之雄也與諸子及二僧步登岸遊廣福永固寺閑然無一人東偏白雲軒前橙方結實雖小而極香相與烹茶破橙抵莫乃還舟中畢家池蓋屬復州玉沙縣滄浪鄉云

五日泊紫渭

六日過東場並水皆茂竹高林隄淨如掃雞犬閒暇鳧

鴨浮沒人往來林樾間亦有臨渡喚船者使人悅然  
如造異境舟人云皆村豪園廬也泊雞鳴

七日泊湛江

八日早次江陵之建寧鎮蓋沌口也晉王澄棄荊州別  
駕郭舒不肯從澄東下乃留屯沌口陳侯安都討王  
琳至沌口皆此地也阻風大魚浮水中無數凡行沌  
中七日自是泛江入石首縣界夜觀隔江燒蘆場煙  
焰亘天如火城火照舟中皆赤

九日早謁后土祠道旁民屋苦茆皆厚尺餘整潔無一枝亂挂帆拋江行三十里泊壠子磯江濱大山也自離鄂州至是始見山買羊置酒益村步以重九故屠一羊諸舟買之俄頃而盡求菊花於江上人家得數枝芬馥可愛為之頽然徑醉夜雨極寒始覆絮衾十日阻風雨遣小舟橫絕江面至對岸買肉食得大魚之半又得一烏牡雞不忍殺畜於舟中俄有村翁持茭萌一束來餉不肯受直遣人先之蔓晚晴開船窗

觀月

十一日舟行望西南一角水與天接舟人云是為潛軍  
港古嘗潛軍伺敵於此遙見港中有兩點正黑疑其  
遠樹則下不屬地久之漸近可辨蓋二千五百斛大  
舟也又有水禽雙浮江中色白類鵝而大楚人謂之  
天鵝飛騫絕高有弋得者味甚美或曰即鵠也泊三  
江口水淺舟行甚艱自此遂不復有山太白詩山隨  
平野盡江入大荒流蓋荆渚所作也

十二日過石首縣不入石首自唐始為縣在龍蓋山之麓下臨漢水亦形勝之地杜子美有送石首薛明府詩即此邑也泊藕池

十三日泊柳子夜過全證二僧舟中聽誦梵語般若心經此經惟蜀僧能誦

十四日次公安古所謂油口也漢昭烈駐軍始更今名規模氣象甚壯兵火之後居民多茆竹然茆屋尤精緻可愛井邑亦頗繁富米斗六七十錢知縣右儒林

郎周謙孫來湖州人遊二聖報恩光孝禪寺二聖謂  
青葉髻如來婁至德如來也皆示鬼神力士之形高  
二丈餘陰威凜然可畏正殿中為釋迦右為青葉髻  
號大聖左為婁至德號二聖三像皆南面予按藏經  
駒字函娑羅浮殊童子成道為青葉髻如來青葉髻  
如來再出世為婁至如來則二如來本一身耳有碑  
言邑人一夕同夢二神人言我青葉髻婁至德如來  
也有二巨木在江干我所運者俟鄙行者來令刻為

我像已而果有人自稱鄙行者又善肖像邑人欣然請之像成人皆謂酷類所夢然碑無年月不知何代也長老祖珠南平軍人寺後有廢城鬢髮尚存圖經謂之呂蒙城然老杜乃曰地曠呂蒙營江深劉備城蓋玄德子明皆屯於此也老杜曉發公安詩注云數月憩息此縣按公移居公安詩云水煙通徑草秋露接園葵而留別公安太易沙門詩云沙村白雪仍含凍江縣紅梅已放春則是以秋至此縣算冬始去其

曰數月憩息益為此也泊弭節亭馴鷗低飛往來竟日不去

十五日周令說縣本在近北枕漢水沙虛岸摧漸徙而南今江流乃昔市邑也又云縣有五鄉然共不及二千戶地曠民寡如此民耕尤苦隄防數壞歲歲增築不止晚攜客再遊二聖寺衆寮有維摩刻木像甚佳云沙市工人所為也方丈西有竹軒頗佳珠老說五祖法演禪師初住四面山子然獨處凡二年始有一

道士來問道乃請作知事又三年僧寶良來與道士朝夕參叩皆得法於是演公之道寢為人知而四方學者始稍有至者雖其後門人之盛稱天下然終身不過數十衆珠聞此於其師卍菴顚禪師荊州絕無禪林惟二聖而已然蜀僧出闕必走江浙回者又已自謂有得不復參叩故語云下江者疾走如煙上江者鼻孔撩天徒勞他二佛打供了不見一僧坐禪十六日過白湖渺然無津拋江至升子舖有天鵝數百

翔泳水際日入泊沙市自公安至此六十里自此至  
荆南陸行十里舟不復進矣老杜詩云買新猶白帝  
鳴艤已沙頭劉夢得云沙頭檣干上始見春江濶皆  
謂此也

十七日日入後遷行李過嘉州趙青船蓋入峽船也沙  
市堤上居者大抵皆蜀人不然則與蜀人為婚姻者  
也

十八日見知府資政殿學士劉恭父珙通判右奉議郎

權嗣行左宣教郎陳孺荆南圖經以為楚之郢都梁元帝亦嘗都焉唐為江陵府荆南節度今因之然牧守署銜但云知荆南軍府與永興河陽正同初無意義但沿舊而已

十九日郡集於新橋馬監監在西門外四十里自出城即黃茅彌望每十餘里有村疃數家而已道遇數十騎縱獵獲狐兔皆繫鞍上割鮮藉草而飲云襄陽軍人也是日極寒如窮冬土人云此月初已嘗有雪

二十日倒檣竿立艤牀蓋上峽惟用艤及百丈不復張帆矣百丈以巨竹四破為之大如人臂予所棄千六百斛舟凡用艤六枝百丈兩車

二十一日劉師丁內艱分迓兵之半負肩輿自山路先歸夔州是日重霧四塞

二十二日五鼓赴能仁院建會慶節道場中夜後舟人祀峽神屠一豨

二十三日奠劉師母安定郡太夫人卓氏劉師受吊禮

與吳人同

二十四日見左朝奉郎湖北安撫司主管機宜文字牛  
達可右奉議郎安撫司幹辦公事湯衡右朝奉郎安  
撫同幹辦公事趙蘊

二十五日右文林郎知歸州興山縣高祁來

二十六日修船始畢骨肉入新船祭江瀆廟用壺酒特  
豕廟在沙市之東三四里神曰昭靈孚應威惠廣源  
王蓋四瀆之一最為典祀之正者然兩廡淫祠尤多

蓋荆楚舊俗也司法參軍右廸功郎王師點錄其叔祖君儀待制訟卦講義來君儀嚴州人師事先大父精於易然遺書不傳講義止存一篇而已然亦其少作也

二十七日解舟擊鼓鳴艤舟人皆大噪擁堤觀者如堵牆泊新河口距沙市三四里蓋蜀人修船處

二十八日泊方城有嘉州人王百一者初應募為船之招頭招頭蓋三老之長顧直差厚每祭神得胙肉倍

衆人既而船戶趙清改用所善程小八為招頭百一失職怏怏又不決去遂發狂赴水予急遣人拯之流一里餘三沒三踊僅得出一招頭得喪能使人至死況大於此者乎

二十九日阻風

十月一日過瓜洲壩倉頭百里洲泊沱澗皆聚落竹樹鬱然民居相望亦有村夫子聚徒教授羣童見船過皆挾書出觀亦有誦書不輟者沱江別名詩江有沱

禹貢岷山導江東別為沱是也灔則爾雅所謂春秋  
夏有水冬無水曰灔也

二日泊桂林灣全證二僧陸行來云沿路民居大抵多  
四方人土著財十一也舟人殺豬十餘口祭神謂之  
開頭

三日舟人分胙行差晚與兒輩登隄觀蜀江乃知李太  
白荆門望蜀江詩江色綠且明為善狀物也自離墻  
子磯至是始望見巴山山在松滋縣泊灌子口蓋松

滋枝江兩邑之間松滋晉縣自此入蜀江枝江唐縣古羅國也江陵九十九洲在焉晉柳約之羅述甄季之聞桓玄死自白帝至枝江即此地也歐陽文忠公有枝江山行五言二十四韻蓋文忠赴夷陵時自此陸行至峽州故其望州坡詩云崎嶇幾日山行倦却喜坡頭見峽州灌子口一名松滋渡劉賓客有詩云巴人淚應緩聲落蜀客船從鳥道回

四日過楊木寨蓋松滋有四寨曰楊木車羊高平稅家

云泊龍灣

五日過白羊市蓋峽州宜都縣境上宜都唐縣也謁張文忠公天覺墓殘伐墓木橫道幾不可行天覺之子直龍圖閣茂已卒二孫一有官病狂易一白丁也初作墓江濱已而不果葬改葬山間今墓是也而舊墓亦不復毀啓隧道出入中可容數十人坐有道人結屋其旁守之道人出一石刻艸書云莫將外物尋竒寶須問真師決乘鉛寄八瓊張子高鍾離權始自王

屋遊都下弟子浮玉山人來乞此字今又將西還丹  
元子再請書卷之末紹聖元年仲冬望日權即世所  
謂鍾離先生子高即天覺丹元子即東坡先生與之  
酬倡者後有魏泰道輔跋云天覺修黃籙醮法成浮  
玉山人謂之曰上天錄公之功為須彌山八瓊洞主  
宜刻印謝帝而佩之天覺不以為信故浮玉又出鍾  
離公書為證後丹元子又為天覺求書卷末又有徐  
注者跋云天覺舟過真州方出謁有布衣幅巾者徑

入舟中索筆大書閒人呂洞賓來謁張天覺十字擲  
筆即去而天覺適歸墨猶未乾注真州人云親見之  
墳前碑樓壁間有詩一篇云秋風十驛望台星想見  
永壺照坐清霖雨已回公旦駕挽鬚聊聽野王箏三  
朝元老心方壯四海蒼生耳已傾白髮故人來一別  
却歸林下看昇平蓋魏道輔贈天覺詩後人所題者  
唐立夫舍人亦有一詩末句云無碑堪墮淚著句與  
招魂宜都知縣右文林郎呂大辨來泊赤崖

渭南文集卷四十七

欽定四庫全書  
文獻要卷一萬五千四百八十八

集部

渭南文集卷四十八

宋 陸游 撰

入蜀記

六日過荊門十二碚皆高崖絕壁巖突兀則峽中之嶮可知矣過碚望五龍及雞籠山差峩正如夏雲之奇峯荊門者當以險固得名碚上有石穴正方高可通人俗謂之荊門則妄也晚至峽州泊至喜亭下峽

州在唐為硤州後改陝而印文則為陝州元豐中郎  
官何洵直建言陝與陝相亂請改鑄印文從山事下  
少府監而監丞歐陽發言湖北之陝州從阜從夾夾兩人  
入陝西之陝州從阜從夾夾從兩人偏旁不同本不相亂

恐四方謂少府監官皆不識字當時朝士之議皆是  
發而卒從洵直言改鑄云至喜亭記歐陽公撰黃魯

直書

七日見知州右朝奉大夫葉安行字履道以小舟遊西

山甘泉寺竹橋石磴甚有幽趣有靜練洗心二亭下  
臨江山頗疎豁法堂之右小徑數十步至一泉曰孝  
婦泉謂姜詩妻龐氏也泉上亦有龐氏祠然歐陽文  
忠公不以為信故其詩曰叢祠已廢姜祠在事迹難  
尋楚語訛又此篇首章云江上孤峯蔽綠蘿初讀之  
但謂孤峯蒙藤蘿耳及至此乃知山下為綠蘿谿也  
又至漢景帝廟及東山寺景帝不知何以有廟於此  
歐陽公為令時有祈雨文在集中東山寺亦見歐陽

公詩距望京門五里寺外一亭臨小池有山如屏環之頗佳亭前冬青及柏皆百餘年物遂至夷陵縣令見縣左從政郎胡振廳事東至喜堂郡守朱虞部為歐陽公所築者已焚壞柱礎尚存規模頗雄深又東則祠堂亦簡陋肖像殊不類可歎廳事前一井相傳為歐陽公所浚水極甘寒為一郡之冠井旁一柏合抱亦傳為公手植晚郡集於楚塞樓遍歷爾雅臺錦障亭亭前海棠二本亦百年物爾雅臺者圖經以為

郭景純註爾雅於此又有絳雪亭取歐陽公千葉紅  
梨詩而紅梨已不存矣

八日五鼓盡解船過下牢關夾江千峯萬嶂有競起者  
有獨拔者有崩欲壓者有危欲墜者有橫裂者有直  
坼者有凸者有窪者有罅者奇怪不可盡狀初冬草  
木皆青蒼不彫西望重山如闕江出其間則所謂下  
牢谿也歐陽文忠公有下牢津詩云入峽山漸曲轉  
灘山更多即此也繫船與諸子及證師登三游洞躡

石蹬二里其險處不可著腳洞大如三間屋有一穴通人過然陰黑峻險尤可畏繚山腹僂自巖下至洞前差可行然下臨溪潭石壁十餘丈水聲恐人又一穴後有壁可居鍾乳歲久垂地若柱正當穴門上有刻云黃大臨弟庭堅同辛紘子大方紹聖二年三月辛亥來遊旁石壁上刻云景祐四年七月十日夷陵歐陽永叔下缺一字又云判官丁下又缺數字丁者寶臣也字元珍今丁字下二字亦髣髴可見殊不

類元珍字又永叔但曰夷陵不稱令洞外溪上又有  
一崩石偃仆刻云黃庭堅弟叔向子相姪檄同道人  
唐履來游觀辛亥舊題如夢中事也建中靖國元年  
三月庚寅按魯直初謫黔南以紹聖二年過此歲在  
乙亥今云辛亥者誤也泊石牌峽石穴中有石如老  
翁持魚竿狀略無少異

九日微雪過扇子峽重山相掩政如屏風扇疑以此得  
名登蝦蟆碚水品所載第四泉是也蝦蟆在山麓臨

江頭鼻吻領絕類而背脊炮處尤逼真造物之巧有  
如此者自背上深入得一洞穴石色綠潤泉泠泠有  
聲自洞出垂蝦蟆口鼻間成水簾入江是日極寒巖  
嶺有積雪而洞中溫然如春碚洞相對稍西有一峯  
孤起侵雲名天柱峯自此山勢稍平然江岸皆大石  
堆積彌望正如濬渠積土狀晚次黃牛廟山復高峻  
村人來賣茶菜者甚衆其中有婦人皆以青斑布帕  
首然頗白皙語音亦頗正茶則皆如柴枝草葉苦不

可入口廟靈感神封嘉應保安侯皆紹興以來制書  
也其下即無義灘亂石塞中流望之可畏然舟過乃  
不甚覺蓋操舟之妙也傳云神佐夏禹治水有功故  
食於此門左右各一石馬頗卑小以小屋覆之其右  
馬無左耳蓋歐陽公所見也廟後叢木似冬青而非  
莫能名者落葉有黑文類符篆葉葉不同兒輩亦求  
得數葉歐詩刻石廟中又有張文忠一贊其詞曰壯  
哉黃牛有大神力輦聚巨石百千萬億劙歛齒牙礧

碗江側壅激波濤險不可測威脅舟人駭怖失色剗羊釀酒千載廟食張公之意似謂神聚石壅流以脅人求祭饗使神之用心果如此豈能巍然廟食千載乎蓋過論也夜舟人來告請無擊更鼓云廟後山中多虎聞鼓則出

十日早以特豕壺酒祭靈感廟遂行過鹿角虎頭史君諸灘水縮已三之二然湍險猶可畏泊城下歸州秭歸縣界也與兒曹步沙上回望正見黃牛峽廟後山

如屏風疊峩峩挿天第四疊上有若牛狀其色赤黃  
前有一人如著帽立者昨日及今早雲冒山頂至是  
始見之因至白沙市慈濟院見主僧志堅問地名城  
下之由云院後有楚故城今尚在因相與訪之城在  
一岡阜上甚小南北有門前臨江水對黃牛峽城西  
北一山蜿蜒回抱山上有伍子胥廟大抵自荆以西  
子胥廟至多城下多巧石如靈壁湖口之類  
十一日過達洞灘灘惡與骨肉皆棄騎陸行過灘灘際

多奇石五色粲然可愛亦或有文成物象及符書者  
猶見黃牛峽廟後山太白詩云三朝上黃牛三算行  
太遲三朝又三算不覺鬢成絲歐陽公云朝朝算算  
見黃牛徒使行人過此愁山高更遠望猶見不是黃  
牛滯客舟蓋諺謂朝見黃牛算見黃牛一朝一算黃  
牛如故故二公皆及之歐陽公自荆渚赴夷陵而有  
下牢三游及蝦蟆碚黃牛廟詩者蓋在官時來游也  
故憶夷陵山詩云憶嘗祇吏役鉅細悉經覩其後又

云荒煙下牢戍百仞塞溪漱蝦蟆噴水簾甘涼勝飲  
酌亦嘗到黃牛泊舟聽猿狖也晚泊馬肝峽口兩山  
對立修聳摩天略如廬山江岸多石百丈縈絆極難  
過夜小雨

十二日早過東澗灘入馬肝峽石壁高絕處有石下垂  
如肝故以名峽其傍又有獅子巖巖中有一小石蹲  
踞張頤碧草被之正如一青獅子微泉泠泠自巖中  
出舟行急不能取嘗當亦佳泉也溪上又有一峯孤

起秀麗略如小孤山晚抵新灘登岸宿新安驛夜雪  
十三日舟上新灘由南岸上及十七八船底為石所損  
急遣人往拯之僅不至沉然銳石穿船底牢不可動  
蓋舟人載陶器多所致新灘兩岸南曰官漕平北曰  
龍門龍門水尤湍急多暗石官漕差可行然亦多銳  
石故為峽中最險處非輕舟無一物不可上下舟人  
冒利以至此可為戒云遊江瀆北廟廟正臨龍門其  
下石罅中有溫泉淺而不涸一村賴之婦人汲水皆

背負一全木盞長二尺下有三足至泉旁以杓挹水及八分即倒坐旁石東盞背上而去大抵峽中負物率著背又多婦人不獨水也有婦人負酒賣亦如負水狀呼買之長跪以獻未嫁者率為同心髻高二尺挿銀釵至六隻後挿大象牙梳如手大

十四日留驛中晚以小舟渡江南登山至江瀆南廟新修未畢有一碑前進士曾華旦撰言因山崩石壅成此灘害舟不可計於是著令自十月至二月禁行舟

知歸州尚書都官員外郎趙誠聞於朝疏鑿之用工八十日而灘害始去皇祐三年也蓋江絕於天聖中至是而復通然灘害至今未能悉去若乘十二月正月水落石盡出時亦可併力盡鐫去銳石然灘上居民皆利於敗舟賤賣板木及滯留買賣必搖沮此役不則賂石工以為石不可去須斷以必行乃可成又舟之所以敗皆失於重載當以大字刻石置驛前則過者必自懲創二者皆不可不講當以告當路者

十五日舟人盡出所載始能挽舟過灘然須修治遂易  
舟離新灘過白狗峽泊舟興山口肩輿遊玉虛洞去  
江岸五里許隔一溪所謂香溪也源出昭君村水味  
美錄於水品色碧如黛呼小舟以渡過溪又里餘洞  
門小纔容丈既入則極大可容數百人宏敞壯麗如  
入大宮殿中有石成幢蓋旛旗芝草竹筍仙人龍虎  
鳥獸之屬千狀萬態莫不逼真其絕異者東石正圓  
如日西石半規如月予平生所見巖竇無能及者有

熙寧中謝師厚峯巖起題名又有陳堯咨所作記叙此洞本末云唐天寶中獵者始得之比歸已夜風急不可秉燭炬然月明如晝兒曹與全師皆杖策相從殊不覺崖谷之險也

十六日到歸州見知州右奉議郎賈選子公通判左朝奉郎陳端彥民瞻館於報恩光孝寺距城一里許蕭然無僧歸之為州纔三四百家負卧牛山臨江州前即人鮚鱉城中無尺寸平土灘聲常如暴雨雨至隔

江有楚王城亦山谷間然地比歸州差平或云楚始  
封於此山海經夏啓封孟除於丹陽城郭璞註云在  
秭歸縣南疑即此也然史記成王封熊繹於丹陽裴  
駘乃云在枝江未詳就是

十七日郡集於望洋堂玩芳亭亦皆沙石擎確之地賈  
守云州倉歲收秋夏二料麥粟粳米共五千餘石僅  
比吳中一下戶耳

十八月初得艤船差小然底濶而輕於上灘為便

十九日郡集於歸鄉堂欲以是晚行不果訪宋玉宅在  
秭歸縣之東今為酒家舊有石刻宋玉宅三字近以  
郡人避太守家諱去之或遂由此失傳可惜也

二十日早離歸州出巫峯門過天慶觀少留觀唐天寶  
元年碑載明皇夢老子事巴東太守劉璠所立字畫  
頗清逸碑側題當時近官吏胥姓名字亦佳又有周  
顯德中荆南判官孫光憲為知歸州高從讓所立碑  
從讓蓋南平王家子弟光憲亦知名國史有事迹蓋

五代時歸峽皆隸荆渚也殿前有柏數百年物觀下  
即吒灘亂石無數飯於靈泉寺遂登舟過業灘亦名  
灘也水落舟輕俄頃遂過

二十一日舟中望石門關僅通一人行天下至險也晚  
泊巴東縣江山雄麗大勝秭歸但井邑極於蕭條邑  
中纔百餘戶自令廨而下皆茅茨了無片瓦權縣事  
秭歸尉右迪功郎王康年尉兼主簿右迪功郎杜德  
先來皆蜀人也謁寇萊公祠堂登秋風亭下臨江山

是日重陰微雪天氣颶飄復觀亭名使人悵然始有  
流落天涯之歎遂登雙柏堂白雲亭堂下舊有萊公  
所植柏今已槁死然南山重複秀麗可愛白雲亭則  
天下幽奇絕境羣山環擁層出間見古木森然往往  
二三百年物欄外雙瀑瀉石澗中跳珠濺玉冷入人  
骨其下是為慈溪奔流與江會予自吳入楚行五千  
餘里過十五州亭榭之勝無如白雲者而止在縣廨  
聽事之後巴東了無一事為令者可以寢飯於亭中

其樂無涯而閼令動輒二三年無肯補者何哉

二十二日發巴東山益奇怪有夫子洞者一竇在峭壁  
絕高處人迹所不可至然髣髴若有攔楯不知所謂  
夫子者何也過三分泉自山竇中出止兩派俗云三  
派有年兩派中熟一派或絕流飢饉泊疲石夜雨  
二十三日過巫山凝真觀謁妙用真人祠真人即世所  
謂巫山神女也祠正對巫山峯巒上入霄漢山腳直  
挿江中議者謂太華衡廬皆無此奇然十二峯者不

可悉見所見八九峯惟神女峯最為纖麗奇峭宜為仙真所託祝史云每八月十五夜月明時有絲竹之音往來峯頂山猿皆鳴達旦方漸止廟後山半有石壇平曠傳云夏禹見神女授符書於此壇上觀十二峯宛如屏障是日天宇晴霽四顧無纖翳惟神女峯上有白雲數片如鸞鶴翔舞裴徊久之不散亦可異也祠舊有烏數百送迎客舟自唐夔州刺史李貽詩已云羣鳥幸胙餘矣近乾道元年忽不至今絕無一

烏不知其故泊清水洞洞極深後門自山後出但黑  
闇水流其中鮮能入者歲旱祈雨頗應權知巫山縣  
左文林郎冉徽之尉右迪功郎文庶幾來

二十四日早抵巫山縣在峽中亦壯縣也市井勝歸峽  
二郡隔江南陵山極高大有路如綫盤屈至絕頂謂  
之一百八盤蓋施州正路黃魯直詩云一百八盤攜  
手上至今歸夢繞羊腸即謂此也縣廨有故鐵盆底  
銳似半甕狀極堅厚銘在其中蓋漢永平中物也缺

處鐵色光黑如佳漆字畫淳質可愛玩有石刻魯直作盆記大畧言建中靖國元年予弟叔向嗣直自涪陵尉攝縣事予起戎州來寓縣廨此盆舊以種蓮余洗滌乃見字云遊楚故離宮俗謂之細腰宮有一池亦當時宮中燕遊之地今湮沒畧盡矣三面皆荒山南望江山奇麗又有將軍墓東晉人也一碑在墓後跌陷入地碑傾前欲壓字纔半存

二十五日晡後至大谿口泊舟出美梨大如升

二十六日發大谿口入瞿唐峽兩壁對聳上入霄漢其  
平如削成仰視天如足練然水已落峽中平如油盃  
過聖姥泉蓋石上一罅人大呼於旁則泉出屢呼則  
屢出可怪也晚至瞿唐關唐故夔州與白帝城相連  
杜詩云白帝夔州各異城蓋言難辨也關西門正對  
灔澦堆堆碎石積成出水數十丈土人云方夏秋水  
漲時水又高於堆數十丈肩輿入關謁白帝廟氣象  
甚古松柏皆數百年物有數碑皆孟蜀時所立庭中

石筍有黃魯直建中靖國元年題字又有越公堂隋  
楊素所創少陵為賦詩者已毀今堂近歲所築亦甚  
宏壯自闕而東即東屯少陵故居也

二十七日早至夔州州在山麓沙上所謂魚復永安宮  
也宮今為州倉而州治在宮西北甘夫人墓西南景  
德中轉運使丁謂薛顏所徙比白帝頗平曠然失闕  
險無復形勢在瀼之西故一曰瀼西土人謂山間之  
流通江者曰瀼云州東南有八陣磧孔明之遺迹碎


石行列如引繩每歲江漲磧上水數十丈比退陣石  
如故

渭南文集卷四十八

謹案卷四十七第十三頁前一行爾雅所謂春秋。  
夏有水冬無水曰澣也刊本謂訛渭今改又案  
爾雅本無此文疑誤

欽定四庫全書





總校官進士臣胡榮  
校對官編修臣裴謙  
謄錄貢生臣孟啟疆

欽定四庫全書叢要

集部

渭南文集卷四十九



詳校官助教臣謝登雋

欽定四庫全書  
渭南文集卷四十九

集部

渭南文集卷四十九

宋 陸游 撰

赤壁詞

招韓無咎

禁門鐘曉憶君來朝路初翔鸞鵠西府中臺推獨步行  
對金蓮宮燭蹙繡華羈僂葩寶帶看即飛騰速人生難  
料一尊此地相屬 回首紫陌青門西湖閒院鎖千梢

脩竹素壁棲鴉應好在殘夢不堪重續歲月驚心功名

看鏡短鬢無多綠一歡休惜與君同醉浮玉

浣溪沙

和無  
咎韻

嬾向沙頭醉玉瓶喚君同賞小窗明夕陽吹角最闊情忙日苦多閒日少新愁常續舊愁生客中無伴怕君

行

又

南鄭  
席上

浴罷華清第二湯紅綿撲粉玉肌涼娉婷初試藕絲裳鳳尺裁成猩血色螭奩熏透麝臍香水亭幽處捧霞

觴

青玉案

與朱景參  
會北嶺

西風挾雨聲翻浪恰洗盡黃茆瘴老慣人閒齊得喪千  
巖高卧五湖歸棹却凌煙像故人小駐平戎帳白  
羽腰間氣何壯我老漁樵君將相小槽紅酒晚香丹荔  
記取蠻江上

水調歌頭

多景樓

江左占形勝最數古徐州連山如畫佳處縹緲著危樓

鼓角臨風悲壯烽火連空明滅往事憶孫劉千里曜戈  
甲萬竈宿貔貅露霑草風落木歲方秋使君宏放談  
笑洗盡古今愁不見襄陽登覽磨滅游人無數遺恨黯  
難收叔子獨千載名與漢江流

浪淘沙

丹陽浮玉

亭席上作

綠樹暗長亭幾把離尊陽關常恨不堪聞何況今朝秋  
色裏身是行人清淚浥羅巾各自消魂一江離恨恰  
平分安得千尋橫鐵鏁截斷煙津

定風波

進賢道上見梅贈王伯壽

欹帽垂鞭送客回。小橋流水一枝梅。衰病逢春都不記。  
誰謂幽香却解逐人來。安得身閒頻置酒。攜手與君  
看到十分開。少壯相從今雪鬢因甚流年羈恨兩相催。

南鄉子

歸夢寄吳檣。水驛江程去路長。想見芳洲初繫纜。斜陽  
煙樹參差認武昌。愁鬢點新霜。曾是朝衣染御香。重  
到故鄉交舊少。淒涼却恐它鄉勝故鄉。

又

早歲入皇州  
樽酒相逢盡勝流  
三十年來真一夢  
堪愁客路蕭蕭兩鬢秋  
蓬崎偶重遊  
不待人嘲我自羞  
看鏡倚樓俱已矣  
扁舟月笛煙蓑萬事休

滿江紅

危堞朱欄登覽處  
一江秋色人正似  
征鴻社燕幾番輕  
別  
繾綣難忘當日語  
淒涼又作它鄉客  
問鬢邊都有幾  
多絲真堪織  
楊柳院秋千陌無限事  
成虛擲如今何

處也夢魂難覓金鴨微溫香縹緲錦茵初展情蕭瑟料  
也應紅淚伴秋霖燈前滴

又

夔州催王伯禮侍御尋梅之集

疎蕙幽香禁不過晚寒愁絕那更是巴東江上楚山千  
疊欹帽闊尋西瀼路鞭鞭笑向南枝說恐使君歸去上  
巒坡孤風月清鏡裏悲華髮山驛外溪橋側悽然回  
首處鳳凰城闕顚頷如今誰領畧飄零已是無顏色問  
行厨何日喚賓僚猶堪折

感皇恩

伯禮立春  
日生日

春色到人間。綵旛初戴正好。春盤細生菜。一般日月只  
有仙家偏耐。雪霜從點鬢。朱顏在。溫詔鴻來延英催。  
對鳳閣鸞臺看除拜。對衣裁穩恰稱綯。紋新帶箇時方  
旋了功名債。

又

小閣倚秋空。下臨江渚漠漠。孤雲未成雨。數聲新雁回。  
首杜陵。何處壯心空。萬里人誰許。黃閣紫樞。築壇開

府莫怕功名欠人做如今熟計只有故鄉歸路石帆山

腳下菱三畝

好事近

寄張真甫

羈雁未成歸腸斷寶箏零落那更凍醪無力似故人情  
薄 瘋雲蠻雨暗孤城身在楚山角煩問鯢南消息怕  
還成疎索

又

風露九霄寒侍宴玉華宮闕親向紫皇香案見金芝千

葉碧壺仙露醞初成香味兩奇絕醉後却騎丹鳳看

蓬萊春色

又次宇文  
卷目韻

客路苦思歸愁似蠶絲千緒夢裏鏡湖煙雨看山無重  
數尊前消盡少年狂慵著送春語花落燕飛庭戶歎  
年光如許

又

歲晚喜東歸掃盡市朝陳迹揀得亂山環處釣一潭澄

碧 賣魚沽酒醉還醒心事付橫笛家在萬重雲外有  
沙鷗相識

又

華表又千年誰記駕雲孤鶴回首舊曾游處但山川城  
郭 紛紛車馬滿人間塵土汙芒屨且訪葛仙丹井看  
巖花開落

又

揮袖別人間飛躡峭崖蒼壁尋見古仙丹竈有白雲成

積心如潭水靜無風一坐數千息夜半忽驚奇事看  
鯨波暎日

又

溢口放船歸薄草散花洲宿兩岸白蘋紅蓼映一蓑新  
綠有沽酒處便為家菱芡四時足明日又乘風去任

江南江北

又

登梅仙山  
絕頂望海

揮袖上西峯孤絕去天無尺拄杖下臨鯨海數煙颸歷

歷 貪看雲氣舞青鸞  
歸路已將夕多謝半山松吹解  
懸愁留客

又

小倦帶餘醒澹澹數櫺斜日驅退睡魔十萬有雙龍蒼  
璧 少年算笑老人衰風味似平昔扶杖凍雲深處探  
溪梅消息

又

覓箇有緣人分付玉壺靈藥誰向市塵深處識遼天狐

鶴月中吹笛下巴陵條華赴前約今古廢興何限歎

山川如昨

又

平旦出秦闕雪色駕車雙鹿借問此行安往賞清伊脩竹漢家宮殿劫灰中春草幾回綠君看變遷如許況紛紛榮辱

又

秋曉上蓮峯高躡倚天青壁誰與放翁為伴有天壇輕

策 鍾然忽變赤龍飛雷雨四山黑談笑做成豐歲笑

禪龕榔栗

鷓鴣天

送葉  
夢錫

家住東吳近帝鄉平生豪舉少年場十千沽酒青樓上  
百萬呼盧錦瑟傍 身易老恨難忘尊前贏得是淒涼  
君歸為報京華舊一事無成兩鬢霜

又

葭萌  
驛作

看盡巴山看蜀山子規江上過春殘憤眠古驛常安枕

熟聽陽關不慘顏 濡服氣嬾燒丹不妨青鬢戲人間  
祕傳一字神仙訣說與君知只是頑

又

梳髮金盤剩一窩畫眉鸞鏡暈雙蛾人間何處無春到  
只有伊家獨占多 微步處奈嬌何春衫初換麴塵羅  
東隣閨草歸來晚忘却新傳子夜歌

又

家住蒼煙落照間絲毫塵事不相關斟殘玉瀣行穿竹

卷罷黃庭卧看山 貪嘯傲任衰殘不妨隨處一開顏  
元知造物心腸別老却英雄似等閒

又

揷脚紅塵已是顛更求平地上青天新來有箇生涯別  
買斷煙波不用錢 沽酒市採菱船醉聽風雨擁蓑眠  
三山老子真堪笑見事遲來四十年

又

嬾向青門學種瓜只將漁釣送年華雙雙新燕飛春岸

片片輕鷗落晚沙 歌縹渺艤嘔啞酒如清露鮓如花  
逢人問道歸何處笑指船兒此是家

又

薛公肅家  
席上作

南浦舟中兩玉人誰知重見楚江濱憑教後苑紅牙版  
引上西川綠錦茵 纏淺笑却輕嚬淡黃楊柳又催春  
情知言語難傳恨不似琵琶道得真

驀山溪

送伯禮

元戎十乘出次高唐館歸去舊鵠行更何人齊飛霄漢

瞿唐水落惟是淚波深催疊鼓起牙檣難鏢長江斷  
春深鼈禁紅日宮輒暖何處望音塵黯消魂層城飛觀  
人情見慣不敢恨相忘梅驛外蓼灘邊只待除書看

又

游三榮  
龍洞

窮山孤壘臘盡春初破寂寞掩空齋好一箇無聊底我  
嘯臺龍岫隨分有雲山臨淺瀨陰長松閒據胡床坐  
三盃徑醉不覺紗巾墮畫角喚人歸落梅村籃輿夜過  
城門漸近幾點妓衣紅官驛外酒爐前也有閒燈火

木蘭花

立春

日作

三年流落巴山道  
破盡青衫塵滿帽  
身如西瀼渡頭雲  
愁抵瞿唐闊上草  
春盤春酒年年好  
試戴銀旛判醉倒  
今朝一歲大家添  
不是人間偏我老

朝中措

梅

幽姿不入少年場  
無語只淒涼  
一箇飄零身世十分冷  
淡心腸  
江頭月底新詩舊夢  
孤恨清香任是春風不  
管也曾先識東皇

又代譚得  
稱作

怕歌愁舞嬾逢迎  
粧晚託春醒總是向人深處當時枉  
道無情  
關心近日啼紅密訴剪綠深  
盟杏館花陰恨  
淺畫堂銀燭嫌明

又

鼙鼙儺鼓錢流年  
燭焰動金船絲燕難尋前夢酥花空  
點春研  
文園謝病闌成久旅回首淒然  
明月梅山笛  
夜和風禹廟鶯天

臨江仙

離果  
州作

鳩雨催成新綠燕泥收盡殘紅春光還與美人同論心  
空眷眷分袂却匆匆 只道真情易寫那知怨句難工  
水流雲散各西東半廊花院月一帽柳橋風

蝶戀花

離小  
益作

陌上簫聲寒食近雨過園林花氣浮芳潤千里斜陽鍾  
欲暝憑高望斷南樓信 海角天涯行客盡三十年間  
無處無遺恨天若有情終欲問忍教霜點相思鬢

又

桐葉晨飄蛩夜語旅思秋光點點長安路忽記橫戈盤  
馬處散闋清渭應如故江海輕舟今已具一卷兵書  
歎息無人付早信此生終不遇當年悔草長楊賦

又

水漾萍根風卷絮倩笑嬌顰忍記逢迎處只有夢魂能  
再遇堪嗟夢不由人做夢若由人何處去短帽輕衫  
夜夜眉州路不怕銀缸深繡戶只愁風斷青衣渡

釵頭鳳

紅酥手黃縢酒滿城春色宮牆柳東風惡歡情薄一懷愁緒幾年離索錯錯錯春如舊人空瘦淚痕紅浥鮫綃透桃花落閒池閣山盟雖在錦書難託莫莫莫

清商怨

葭萌  
驛作

江頭日暮痛飲乍雪晴猶凜山驛淒涼燈昏人獨寢駕機新寄斷錦歎往事不堪重省夢破南樓綠雲堆

一枕

水龍吟

榮甫作

樽前花底尋春處堪歎心情全減一身萍寄酒徒雲散  
佳人天遠那更今年瘴煙蠻雨夜郎江畔漫倚樓橫笛  
臨窗看鏡時揮涕驚流轉 花落月明庭院悄無言魂  
消腸斷憑肩攜手當時曾效畫梁栖燕見說新來網榮  
塵暗舞衫歌扇料也羞顛願慵行芳徑怕啼鶯見

秋波媚

七月十六日晚登高興亭望長安南山

秋到邊城角聲哀烽火照高臺悲歌擊筑憑高醉酒此

興悠哉 多情誰似南山月特地莫雲開灞橋煙柳曲  
江池館應待人來

又

曾散天花蓋珠宮一念墮塵中鉛華洗盡珠璣不御道  
骨仙風 東遊我醉騎鯨去君駕素鸞從垂虹看月天  
台采藥更與誰同

采桑子

寶釵樓上粧梳晚嬾上鞦韆閒撥沉煙金縷衣寬睡髻

偏鱗鴻不寄遼東信又是經年彈淚花前愁入春風

十四絃

卜算子

詠梅

驛外斷橋邊寂寞開無主已是黃昏獨自愁更著風和雨無意苦爭春一任羣芳妬零落成泥碾作塵只有香如故

沁園春

三榮橫路

閻小晏

粉破梅梢綠動萱叢春意已深漸珠簾低卷筇枝微步

冰開躍鯉林暖鳴禽荔子扶疎竹枝哀怨濁酒一尊和淚斟憑欄久歎山川冉冉歲月駸駸當時豈料如今漫一事無成霜鬢侵看故人強半沙堤黃閣魚懸帶玉貌映蟬金許國雖堅朝天無路萬里淒涼誰寄音東風裏有灞橋煙柳知我歸心

又

一別秦樓轉眼新春又近放燈憶盈盈倩笑纖纖柔握玉香花語雪暖酥凝念遠愁腸傷春病思日怪平生殊

未曾君知否漸香消蜀錦淚漬吳綾 難求繫日長繩  
況倦客飄零少舊朋但江郊雁起漁村笛怨寒缸委燼  
孤硯生冰水繞山圍煙昏雲慘縱有高臺常怯登消魂  
處是魚牋不到蘭夢無憑

又

孤鶴歸飛再過遼天換盡舊人念纍纍枯塚茫茫夢境  
王侯蝶蟬畢竟成塵載酒園林尋花巷陌當日何曾輕  
負春流年改歎圍腰帶剝點鬢霜新 交親散落如雲

又豈料如今餘此身幸眼明身健茶甘飯軟非惟我老  
更有人貧躲盡危機消殘壯志短艇湖中閒采蓴吾何  
恨有漁翁共醉谿友為隣

憶秦娥

玉花驄晚街金轡聲璁瓈聲璁瓈閒欹烏帽又過城東  
富春巷陌花重重千金沽酒酬春風酬春風笙歌闌

裏錦繡叢中

漢宮春

張國賞海棠作周  
改蜀燕王宮也

浪迹人間喜聞猿楚峽學劔秦川虛舟汎然不繫萬里  
江天朱顏綠鬢作紅塵無事神仙何妨在鶯花海裏行  
歌闌送流年 休笑放慵狂眼看閒坊深院多少嬋娟  
燕宮海棠夜宴花覆金船如椽畫燭酒闌時百炬吹煙  
憑寄語京華舊侶幅巾莫換貂蟬

又

初自南鄭  
來成都作

羽箭雕弓憶呼鷹古壘截虎平川吹笳莫歸楚帳雪壓  
青氈淋漓醉墨看龍蛇飛落蠻牋人誤許詩情將略一

時才氣超然 何事又作南來看重陽藥市元夕燈山  
花時萬人樂處欹帽垂鞭聞歌感舊尚時時流涕尊前  
君記取封侯事在功名不信由天

月上海棠

成都城南有蜀王舊苑  
多梅皆二三百餘年古木

斜陽廢苑朱門閉吊興亡遺恨淚痕裏淡淡宮梅也依然點酥剪水凝愁處似憶宣華舊事 行人別有淒涼意折幽香誰與寄千里佇立江皋杳難逢隴頭歸騎音塵遠楚天危樓獨倚

宣華故  
蜀苑名

又

蘭房繡戶厭厭病歎春醒和悶甚時醒燕子空歸幾曾  
傳玉闕邊信傷心處獨展團窠瑞錦熏籠消歇沉煙  
冷淚痕深展轉看花影漫擁餘香怎禁他峭寒孤枕西  
窗曉幾聲銀瓶玉井

烏夜啼

金鴨餘香尚煖綠窗斜日偏明蘭膏香染雲鬟膩釵墜  
滑無聲冷落鞦韆伴侶闌珊打馬心情繡屏驚斷瀟  
滑無聲

湘夢花外一聲鶯

又

簷角楠陰轉日樓前荔子吹花鷓鴣聲裏霜天晚疊鼓  
已催衙鄉夢時來枕上京書不到天涯邦人訟少文  
移省閒院自煎茶

又

我挾丹臺玉字君書蓋殿雲篇錦官城裏重相遇心事  
兩依然攜酒何妨處處尋梅共約年年細思上界多

官府且作地行仙

又

世事從來慣見吾生更欲何之  
鏡湖西畔秋千頃鷗鷺  
共忘機一枕蘋風午醉二升菰米晨炊  
故人莫訝音書絕釣侶是新知

又

素意幽棲物外塵緣浪走天涯歸來猶幸身強健隨分  
作山家已趁餘寒泥酒還乘小雨移花柴門盡日無

人到一徑傍谿斜

又

園館青林翠樾衣巾細葛輕紈好風吹散霏微雨沙路  
喜新乾小燕雙飛水際流鶯百轉林端投壺聲斷彈  
棋罷閒展道書看

又

從宦元知漫浪還家更覺清真蘭亭道上多脩竹隨處  
岸綸巾泉冽偏宜雪茗杭香雅稱絲尊翛然一飽西

窗下天地有閒人

又

紈扇蟬娟素月紗巾縹渺輕煙高槐葉長陰初合清潤  
雨餘天 吳筆斜行小草釣簾淺醉閒眠更無一點塵  
埃到枕上聽新蟬

真珠簾

山村水館參差路感羈遊正是殘春風絮掠地穿簾知  
是竟歸何處鏡裏新霜空自憫問幾時鸞臺鼈署遲莫

謾憑高懷遠書空獨語　自古儒冠多誤悔當年早不  
扁舟歸去醉下白蘋洲看夕陽鷗鷺菰菜鱸魚都棄了  
只換得青衫塵土休顧早收身江上一蓑煙雨

好事近

混迹寄人間夜夜畫樓銀燭誰見五雲丹竈養黃芽初  
熟　春風歸從紫皇遊東海宴暘谷進罷碧桃花賦賜  
玉塵千斛

渭南文集卷四十九

欽定四庫全書

渭南文集卷五十

集部

宋 陸游 撰

柳梢青

故蜀燕王宮海棠之盛  
為成都第一今屬張氏

錦里繁華環宮故邸  
罍蕡萼奇花俊客妖姬爭飛金勒齊  
駐香車 何須幕障帷遮寶盆  
浸紅雲瑞霞銀燭光中  
清歌聲裏休恨天涯

又 乙巳二月  
西典贈別

十載江湖行  
歌沽酒不到京華底  
事翩然長亭煙草衰  
鬢風沙  
憑高目斷天涯  
細雨外樓臺萬家  
只恐明朝一時不見人共梅花

夜遊宮

記夢寄師伯渾

雪曉清笳亂起  
夢游處不知何地  
鐵騎無聲望似水  
想關河  
雁門西青海際  
睡覺寒燈裏漏聲  
斷月斜窗紙  
自許封侯在萬里  
有誰知  
鬢雖殘心未死

又詞

獨夜寒侵翠被奈幽夢不成還起欲寫新愁淚濺紙憶  
承恩歎餘生今至此 萩萩燈花墜問此際報人何事  
只尺長門過萬里恨君心似危攔難久倚

安公子

風雨初經社子規聲裏春光謝最是無情零落盡薔薇  
一架況我今年顚頷幽窗下人盡怪詩酒消聲價向藥  
爐經卷忘却鶯窗柳榭 萬事收心也粉痕猶在香羅  
帕恨月愁花爭信道如今都罷空憶前身便向章臺馬

因自來禁得心腸怕縱遇歌逢酒但說京都舊話

玉蝴蝶

王忠州家席上作

倦客平生行處墜鞭京洛解佩瀟湘此夕何年來賦宋  
玉高唐繡簾開香塵乍起蓮步穩銀燭分行暗端相燕  
羞鶯妬蝶遠蜂忙難忘芳樽頻勸峭寒新退玉漏猶  
長幾許幽情只愁歌罷月侵廊欲歸時司空笑悶微近  
處丞相嗔狂斷人腸假饒相送上馬何妨

木蘭花慢

夜登青城山玉華樓

閱邯鄲夢境歎綠鬢早霜侵奈華岳燒丹青谿看鶴尚  
負初心年來向濁世裏悟真詮祕訣絕幽深養就金芝  
九畹種成琪樹千林 星壇夜學步虛吟露冷透瑤簪  
對翠鳳披雲青鸞遡月宮闕蕭森琅函一封奏罷自釣  
天帝所有知音却過蓬壺嘯傲世間歲月駸駸

蘓武慢

唐西安湖

澹靄空濛輕陰清潤綺陌細塵初靜平橋繫馬畫閣移  
舟湖水倒空如鏡掠岸飛花傍簷新燕都似學人無定

歎連年戎帳經春邊壘暗凋顏鬢空記憶杜曲池臺  
新豐歌管怎得故人音信羈懷易感老伴無多談麈久  
閑犀柄惟有翛然筆床茶竈自適筭輿煙艇待綠荷遮  
岸紅蕖浮水更乘幽興

齊天樂

左綿道中

角殘鐘晚闔山路行人乍依孤店塞月征塵鞭絲帽影  
常把流年虛占藏鴉柳暗歎輕負鶯花謾勞書劔事往  
闕情悄然頻動壯遊念孤懷誰與強遣市廬沽酒酒

薄怎當愁釅倚瑟妍詞調鉛妙筆那寫柔情芳豔征途  
自厭況煙歛蕪痕雨稀萍點最是眠時枕寒門半掩

又

三榮人  
日作

客中隨處閒消悶來尋嘯臺龍岫路飲春泥山開翠霧  
行樂年年依舊天工妙手放輕綠萱牙淡黃楊柳笑問  
東君為人能染鬢絲否 西州催去近也帽簷風軟且  
看市樓沽酒宛轉巴歌淒涼塞管攜客何妨頻奏征塵  
暗袖漫禁得梅花伴人疎瘦幾日東歸畫船平放溜

望梅

壽非金石恨天教老向水程山驛似夢裏來到南柯這些子光陰更堪輕擲戍火邊塵又過了一年春色歎名姬駿馬盡付杜陵苑路豪客長繩漫勞繫日看人間俛仰俱是陳迹縱自倚英氣凌雲奈回盡鵬程鍛殘鸞翮終日憑高悄不見江東消息算沙邊也有斷鴻倩誰問得

洞庭春色

壯歲文章莫年勲業自昔誤人算英雄成敗軒裳得失  
難如人意空喪天真請看邯鄲當日夢待炊罷黃粱徐  
欠伸方知道許多時富貴何處關身人間定無可意  
怎換得玉鱠絲蓆且釣竿漁艇筆牀茶竈閒聽荷雨一  
洗衣塵洛水秦闕千古後尚棘暗銅駝空愴神何須更  
慕封侯定遠圖像麒麟

漁家傲

寄仲高

東望山陰何處是往來一萬三千里寫得家書空滿紙

流清淚書回已是明年事 寄語紅橋橋下水扁舟何  
日尋兄弟行徧天涯真老矣愁無寐鬢絲幾縷茶煙裏

繡停針

歎半紀跨萬里秦吳頓覺衰謝回首鶴行英俊竝遊只  
尺玉堂金馬氣凌嵩華負壯畧縱橫王霸夢經洛浦梁  
園覺來淚流如瀉 山林定去也却自恐說著少年時  
話靜院焚香閒倚素屏今古總成虛假趁時婚嫁幸自  
有湖邊茅舍燕歸應笑客中又還過社

桃園憶故人

并序

三榮麗治之西因子城作樓觀曰高齋下臨山  
村蕭然如世外余留七十日被命參成都戎幙  
而去臨行徒倚竟日作桃源憶故人一首

斜陽寂歷柴門閑一點炊煙時起雞犬往來林外俱有  
蕭然意衰翁老去疎榮利絕愛山城無事臨去畫樓  
頻倚何日重來此

又

應霧

道中

欄干幾曲高齋路正在重雲深處丹碧未乾人去高棟  
空留句離離芳草長亭莫無奈征車不住惟有斷鴻  
煙渚知我頻回顧

又

一彈指頃浮生過墮甑元知當破去去醉吟高卧獨唱  
何須和殘年還我從來我萬里江湖煙舸脫盡利名  
韁繩世界元來大

又

城南載酒行  
歌路冶葉倡條無數  
一朶鞋紅凝露最是  
關心處  
鶯聲無賴催春去  
那更兼旬風雨試問歲華  
何許芳草連天莫

又題華山圖

中原當日三川震  
關輔回頭煨燼淚盡  
兩河征鎮日望中  
興運秋風霜滿青  
青鬢老却新豐英俊  
雲外華山千仞依舊  
無人問

極相思

江頭疎雨輕煙寒食落花天  
飄紅墜素殘霞暗錦一段  
淒然 惘東君堪恨處也不念冷落樽前那堪更看  
漫空相趁柳絮榆錢

一叢花

樽前凝佇漫魂迷猶恨負幽期從來不慣傷春淚為伊  
後滴滿羅衣那看更是吹簫池館青子綠陰時 回廊  
簾影晝參差偏共睡相宜朝雲夢斷知何處倩雙燕說  
與相思從今判了十分顚頷圖要箇人知

又

仙姝天上自無雙玉面翠蛾長黃庭讀罷心如水閑朱  
戶愁近綠簷窗明几淨閒臨唐帖深炷寶龕香人間  
無藥駐流光風雨又催涼相逢共話清都舊歎塵刦生  
死茫茫何如伴我綠蓑青箬秋晚釣瀟湘

隔浦蓮近拍

飛花如趁燕子直度簾櫳裏帳掩香雲暖金籠鸚鵡驚  
起凝恨慵梳洗粧臺畔蘸粉纖纖指寶釵墜才醒又

困厭厭中酒滋味  
牆頭柳暗過盡一年  
春事罨畫高樓  
怕獨倚千里孤舟  
何處煙水

又

騎鯨雲路倒景醉面風吹醒笑把浮丘袂寥然非復塵  
境震澤秋萬頃煙霏散水面飛金鏡露華冷湘妃睡  
起鬟傾釵墜慵整臨江舞處零亂塞鴻清影河漢橫斜  
夜漏永人靜吹簫同過綠嶺

昭君怨

晝永蟬聲庭院人倦嬾搖團扇小景寫瀟湘自生涼

簾外蹴花雙燕簾下有人同見寶篆拆宮黃炷熏香

雙頭蓮

呈范至能待制

華鬢星星驚壯志成虛此身如寄蕭條病驥向暗裏消  
盡當年豪氣夢斷故國山川隔重重煙水身萬里舊社  
凋零青門俊遊誰記盡道錦里繁華歎官閒晝永柴  
荆添睡清愁自醉念此際付與何人心事縱有楚施吳  
檣知何時東逝空悵望鱠美菰香秋風又起

南歌子

送周機宜  
之益昌

異縣相逢晚 中年作別難  
莫秋風雨客衣寒 又向朝天  
門外話悲歡 瘦馬行霜棧  
輕舟下雪灘 烏奴山下一  
林丹為說三年常寄夢魂間

豆葉黃

春風樓上柳腰肢 初試花前金縷衣  
嫋嫋娉娉不自持 晚粧遲畫得蛾眉勝舊時

又

一春常是雨和風。風雨晴時春已空。誰惜泥沙萬點紅。  
恨難窮恰似衰翁一世中。

醉落魄

江湖醉客投盃起。舞遺烏幘三更冷。翠霑衣溼嫋嫋萎  
歌催落半川月。空花昨夢休尋覓。雲臺麟閣俱陳迹  
元來只有閒難得。青史功名天却無心惜。

鵲橋仙

華燈縱博雕鞍馳射誰記當年豪舉酒徒一一取封侯

獨去作江邊漁父 輕舟八尺低蓬三扇占斷蘋洲煙  
雨鏡湖元自屬閒人又何必君恩賜與

又

一竿風月一蓑煙雨家在釣臺西住賣魚生怕近城門  
況肯到紅塵深處 潮生理櫂潮平繫纜潮落浩歌歸  
去時人錯把比嚴光我自是無名漁父

又  
夜聞杜鵑

茆簷人靜蓬窗燈暗春晚連江風雨林鶯巢燕總無聲

但月夜常啼杜宇 催成清淚驚殘孤夢又揀深枝飛  
去故山猶自不堪聽況半世飄然羈旅

長相思

雲千重水千重身在千重雲水中月明收釣筒 頭未  
童耳未聾得酒猶能雙臉紅一尊誰與同

又

橋如虹水如空一葉飄然煙雨中天教稱放翁 倒船  
蓬使江風蟹舍參差漁市東到時聞莫鐘

又

面蒼然鬢皤然滿腹詩書不直錢官閒常畫眠  
畫凌煙上甘泉自古功名屬少年知心惟杜鵑

又

莫山青莫霞明夢筆橋頭艇子橫蘋風吹酒醒  
看潮生看潮平小住西陵莫較程尊絲初可烹

又

悟浮生厭浮名回視千鍾一髮輕從今心太平  
愛松

聲愛泉聲寫向孤桐誰解聽空江秋月明

菩薩蠻

江天淡碧雲如掃蘋花零落尊絲老細細晚波平月從  
波面生漁家真箇好悔不歸來早經歲洛陽城鬚絲  
添幾莖

又

小院蠶眠春欲老新巢燕乳花如掃幽夢錦城西海棠  
如舊時當年真草草一櫂還吳早題罷惜春詩鏡中

添鬢絲

訴衷情

當年萬里覓封侯。足馬戍梁州。關河夢斷何處。塵暗舊貂裘。 謂未雪鬢先秋。淚空流。此生誰料。心在天山。身

老滄洲

又

青衫初入九重城。結友盡豪英。蠟封夜半傳檄。馳騎諭幽并。 時易失志難成。鬢絲生平。章風月彈壓江山別。

是功名

生查子

還山荷主恩聊試扶犁手新結小茆茨恰占清江口  
風塵不化衣鄰曲常持酒那似宦遊時折盡長亭柳

又

梁空燕委巢院靜鶗催雨香潤上朝衣客少閒談麈  
鬢邊千縷絲不是吳蠶吐孤夢泛瀟湘月落聞柔艣

破陣子

仕至千鍾良易年過七十常稀眼底榮華元是夢身後  
聲名不自知營營端為誰幸有旗亭沽酒何妨繭紙題詩幽谷雲蘿朝採藥靜院軒窗夕對棋不歸真箇癡

又

看破空花塵世放輕昨夢浮名蠟屐登山真率飲筇杖  
穿林自在行身閒心太平料峭餘寒猶力廉纖細雨初晴苔紙閒題谿上句菱唱遙聞煙外聲與君同醉醒

上西樓

見歡一名相

江頭綠暗紅稀燕交飛忽到當年行處恨依依灑清淚歎人事與心違滿酌玉壺花露送春歸

點絳脣

采藥歸來獨尋茆店沽新釀莫煙千嶂處處聞漁唱醉弄扁舟不怕黏天浪江湖上遮回疎放作箇閒人樣

謝池春

壯歲從戎曾是氣吞雄虎陣雲高狼烽夜舉朱顏青鬢擁雕戈西戍笑儒冠自來多誤功名夢斷却泛扁舟

吳楚漫悲歌傷懷弔古煙波無際望秦關何處歎流年

又成虛度

又

賀鑑湖邊初繫放翁歸棹小園林時時醉倒春眠驚起  
聽啼鶯催曉歎功名誤人堪笑朱橋翠徑不許京塵  
飛到挂朝衣東歸欠早連宵風雨捲殘紅如掃恨樽前  
送春人老

又

七十衰翁不減少年豪氣似天山  
淒涼病驥銅駕荆棘灑臨風清淚甚情懷  
伴人兒戲如今何幸作箇故谿歸計鶴飛來晴嵐映翠玉壺春酒約羣仙同醉洞天寒  
露桃開未

一落索

滿路遊絲飛絮韶光將莫此時誰與說新愁有百囀流鶯語  
頗仰人間今古神仙何處花前須判醉扶歸酒不到劉伶墓

又

識破浮生虛妄從人譏謗此身恰是弄潮兒曾過了千  
重浪 且喜歸來無恙一壺春釀雨蓑煙笠傍漁磯應  
不是封侯相

杏花天

老來駒隙駸駸度算只合狂歌醉舞金盃到手君休訴  
看著春光又莫 誰為倩柳條繫住且莫遣城笳催去  
殘紅轉眼無尋處盡屬蜂房燕戶

太平時

竹裏房籠一徑深  
靜愔愔亂紅飛盡  
綠成陰有鳴禽  
臨罷蘭亭無一事  
自修琴銅爐裊裊海南沉  
洗塵襟

戀繡衾

不惜貂裘換釣篷  
嗟時人誰識放翁  
歸櫂借樵風穩數聲  
聞林外莫鐘幽棲  
莫笑蝸廬小有雲山煙水萬重  
半世向丹青看喜如今身在畫中

又

無方能駐臉上紅笑浮生擾擾夢中平地是冲霄路又  
何勞千日用功飄然再過蓮峯下亂雲深吹下莫鐘  
訪舊隱依然在但鶴巢時有墮松

風入松

十年裘馬錦江濱酒隱紅塵萬金選勝鷺花海倚疎狂  
驅使青春吹笛魚龍盡出題詩風月俱新自憐華髮  
滿紗巾猶是官身鳳樓常記當年語問浮名何似身親  
欲寄吳牋說與這回真箇閒人

真珠簾

燈前月下嬉遊處向笙歌錦繡叢中相遇彼此知名纔見便論心素淺黛嬌蟬風調別最動人時時偷顧歸去想閒牕深院調絃促柱樂府初翻新譜漫裁紅點翠閒題金縷燕子入簾時又一番春暮側帽燕脂坡下過料也記前年崔護休訴待從今須與好花為主

風流子

一名內家嬌

佳人多命薄初心慕德耀嫁梁鴻記綠窗睡起靜吟閒

詠句翻離合格變玲瓏更乘興素紈留戲墨纖玉撫孤桐蟾滴夜寒水浮微凍鳳牋春麗花研輕紅人生誰能料堪悲處身落柳陌花叢空羨畫堂鸚鵡深閉金籠

向寶境鸞釵臨粧常晚繡茵牙版催舞還慵腸斷市橋月笛燈院霜鐘

雙頭蓮

風卷征塵堪歎處青驄正搖金轡客襟貯淚漫萬點如血憑誰持寄佇想豔態幽情壓江南佳麗春正媚怎忍

長亭匆匆頓分連理 目斷淡日平蕪  
煙濃樹遠微茫  
如齊悲歡夢裏奈倦客又是關河千里最苦唱徹驪歌  
重遲留無計何限事待與叮嚀行時已醉

鷓鴣天

杖履尋春苦未遲洛城櫻筍正當時三千界外歸初到  
五百年前事總知 吹玉笛渡清伊相逢休問姓名誰  
小車處士深衣叟曾是天津共賦詩

蝶戀花

禹廟蘭亭今古路  
一夜清霜染盡湖邊樹  
鸚鵡杯深君莫訴  
他時相遇知何處  
冉冉年華留不住  
鏡裏朱顏畢竟消磨去  
一句叮嚀君記取  
神仙須是閒人做

渭南文集卷五十

謹案卷四十九第六頁後八行挂杖下臨鯨海刊

本挂訛桂今改

欽定四庫全書

